

CINNTÍ

CINNEADH CUR CHUN FEIDHME (AE) 2022/33 ÓN gCOIMISIÚN

an 10 Eanáir 2022

lena n-aisghairtear Cinneadh Cur Chun Feidhme (AE) 2021/2021 maidir le bearta áirithe éigeandála a bhaineann le fiabhras Afracach na muc sa Ghearmáin

(a bhfuil fógra tugtha ina leith faoi dhoiciméad C(2022) 155)

(An téacs Gearmáinise amháin atá barántúil)

(Téacs atá ábhartha maidir le LEE)

TÁ AN COIMISIÚN EORPACH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán (AE) 2016/429 ó Pharlaimint na hEorpa agus ón gComhairle an 9 Márta 2016 maidir le galair in-tarchurtha ainmhithe agus lena leasaítear agus lena n-aisghairtear gníomhartha áirithe i réimse na sláinte ainmhithe (“Dlí maidir le Sláinte Ainmhithe”) ⁽¹⁾, agus go háirithe Airteagal 259(1) de,

De bharr an mhéid seo a leanas:

- (1) Is galar víreasach tógalach é fiabhras Afracach na muc a bhíonn ar mhuc-ainmhithe atá ar coimeád agus ar mhuc-ainmhithe fiáine agus d’fhéadfadh tionchar tromchúiseach a bheith aige ar an daonra ainmhithe lena mbaineann agus ar bhrabúsacht na feirmeoireachta, rud a chuirfeadh isteach ar ghluaiseacht choinsíneachtaí na n-ainmhithe sin agus a dtáirgí laistigh den Aontas agus ar onnmhairí go tríú tíortha.
- (2) I gcás ráig d’fhiabhras Afracach na muc i muc-ainmhithe atá ar coimeád, tá baol suntasach ann go leathfadh an galar sin go bunaíochtaí eile muc-ainmhithe atá ar coimeád.
- (3) Le Rialachán Tarmligthe (AE) 2020/687 ón gCoimisiún ⁽²⁾, déantar forlíonadh ar na rialacha maidir le rialú na ngalar liostaithe dá dtagraítear in Airteagal 9(1), pointe (a), pointe (b) agus pointe (c) de Rialachán (AE) 2016/429, agus a shainítear mar ghalair i gcatagóir A, B agus C i Rialachán Cur Chun Feidhme (AE) 2018/1882 ón gCoimisiún ⁽³⁾. Go háirithe, déantar foráil in Airteagal 21 agus Airteagal 22 de Rialachán Tarmligthe (AE) 2020/687 maidir le crios srianta a bhunú i gcás ráig de ghalair i gcatagóir A, lena n-áirítear fiabhras Afracach na muc, agus maidir le bearta áirithe a bheidh le cur i bhfeidhm iontu. Ina theannta sin, foráiltear le hAirteagal 21(1) den Rialachán Tarmligthe sin go gcuimseofar sa chrios srianta crios cosanta, crios faireachais, agus, más gá, criosanna srianta breise timpeall na gcriosanna cosanta agus faireachais nó cóngarach dóibh.
- (4) Tar éis ráig d’fhiabhras Afracach na muc i muc-ainmhithe atá ar coimeád in Mecklenburg-Vorpommern na Gearmáine, a deimhníodh an 15 Samhain 2021, agus an fhaisnéis a fuarthas ón mBallstát cónaidhme sin maidir le staid an ghalair ar a chríoch, glacadh Cinneadh Cur Chun Feidhme (AE) 2021/2021 ón gCoimisiún ⁽⁴⁾. Foráiltear leis an gCinneadh Cur Chun Feidhme sin go n-áirítear an Ghearmáin go mbeidh ar a laghad na limistéir a liostaítear san Iarscríbhinn a ghabhann leis an gCinneadh Cur Chun Feidhme sin sa chrios srianta, i gcás ina mbeidh feidhm ag na bearta le haghaidh criosanna cosanta agus faireachais dá bhforáiltear i Rialachán Tarmligthe (AE) 2020/687. Beidh feidhm ag an gCinneadh Cur Chun Feidhme sin go dtí an 15 Feabhra 2022.

⁽¹⁾ IO L 84, 31.3.2016, lch. 1.

⁽²⁾ Rialachán Tarmligthe (AE) 2020/687 ón gCoimisiún an 17 Nollaig 2019 lena bhforlíontar Rialachán (AE) 2016/429 ó Pharlaimint na hEorpa agus ón gComhairle a mhéid a bhaineann le rialacha i dtaca le galair liostaithe áirithe a chosc agus a rialú (IO L 174, 3.6.2020, lch. 64).

⁽³⁾ Rialachán Cur Chun Feidhme (AE) 2018/1882 ón gCoimisiún an 3 Nollaig 2018 maidir le rialacha áirithe coisctheacha agus rialacha rialaithe galar a chur i bhfeidhm ar chatagóirí galar liostaithe agus lena mbunaítear liosta speiceas agus grúpaí speiceas a bhfuil baol suntasach ag baint leo ó thaobh leathadh na ngalar liostaithe sin de (IO L 308, 4.12.2018, lch. 21).

⁽⁴⁾ Cinneadh Cur Chun Feidhme (AE) 2021/2021 ón gCoimisiún an 18 Samhain 2021 maidir le bearta áirithe éigeandála a bhaineann le fiabhras Afracach na muc (IO L 413, 19.11.2021, lch. 34).

- (5) Ag deireadh mhí na Nollag 2021, chuir an Ghearmáin an Coimisiún ar an eolas faoi staid fhabhrach reatha fhiabhras Afracach na muc i muc-ainmhithe atá ar coimeád sa chríos srianta in Mecklenburg-Vorpommern agus gur cuireadh na bearta le haghaidh criosanna cosanta agus faireachais chun feidhme go cuí i gcomhréir le Rialachán Tarmlichte (AE) 2020/687 chun leathadh an ghalair sin a chosc.
- (6) Agus staid fhabhrach reatha fhiabhras Afracach na muc atá ar coimeád i staid Mecklenburg-Vorpommern agus na bearta atá curtha chun feidhme go cuí ag an nGearmáin á gcur san áireamh, agus chun aon suaitheadh neamhriachtanach ar thrádáil a chosc, is iomchuí Cinneadh Cur Chun Feidhme (AE) 2021/2021 a aisghairm le héifeacht ón 15 Eanáir 2022.
- (7) Na bearta dá bhforáiltear sa Chinneadh seo, is bearta iad atá i gcomhréir leis an tuairim ón mBuainchoiste um Plandaí, Ainmhithe, Bia agus Beatha,

TAR ÉIS AN CINNEADH SEO A GHLACADH:

Airteagal 1

Aisghairtear Cinneadh Cur Chun Feidhme (AE) 2021/2021 le héifeacht ón 15 Eanáir 2022.

Airteagal 2

Is chuig Poblacht Chónaidhme na Gearmáine a dhírítear an Cinneadh seo.

Arna dhéanamh sa Bhruiséil, 10 Eanáir 2022.

Thar ceann an Choimisiúin
Stella KYRIAKIDES
Comhalta den Choimisiún
